



Հ Ա Ն Գ Ի Ս Տ

ԳԵՐԱՇՆՈՐՀ Տ. ՍԱՀԱԿ ԱՐՔԵՊԻՍԿՈՊՈՍ ՏԵՐ-ՀՈՎՀԱՆՆԻՍՅԱՆԻ
(1879—1965)



Օգոստոսի 22-ին, կիրակի, երեկոյան ժամը 5.30-ին, Մայր Աթոռում 86 տարեկան հասակում վախճանվեց Գերագույն Հոգևոր Խորհրդի ատենապետ և Մայր Տաճարի նախկին վաստակավոր լուսարարապետ գերաշնորհ Տ. Սահակ արքեպիսկոպոս Տեր-Հովհաննիսյանը:

Հանգուցյալը ծնվել էր Թիֆլիսում, 1879 թվականի օգոստոսի 11/24-ին: Մկրտության անունը եղել է Լևոն: Նախնական կրթու-

թյունն ստացել է Թիֆլիսի Ս. Աստվածածին եկեղեցու ծխական դպրոցում, այնուհետև մտնելով Ներսիսյան հոգևոր դպրոցը, ավարտել է այն 1899 թվականին:

Դպրոցն ավարտելուց հետո, վարել է ուսուցչության և վերակացության պաշտոն: Ծառայել է Արմավիրի և Աստրախանի հայոց եկեղեցիներում:

Ստավրոպոլ քաղաքի ծխականների կողմից ընտրվելով քահանայության թեկնածու, 1903 թվականի փետրվարի 9-ին Արիստակես արքեպիսկոպոսի կողմից ձեռնադրվում է քահանա և նշանակվում կրոնի ուսուցիչ Ստավրոպոլի գիմնազիաներում և հայկական դպրոցներում:

Այնուհետև, երիտասարդ Տ. Սահակ քահանայի առաջ բացվում է եկեղեցական-հասարակական գործունեության լայն ապարնգ:

Տ. Սահակ քահանա Տեր-Հովհաննիսյանը ունեցել է նաև գրական-եկեղեցական գործունեություն: 1909—1919 թվականներին նա հրատարակել է ռուսերեն ընդարձակ օրացույց՝ ռուսախոս հայերի համար: Նա հրատարակել է նաև կրոնի դասագիրք հայ-ռուսերեն բառարանով, Կարապետ եպիսկոպոս Տեր-Մկրտչյանի կենսագրականը, Գևորգ Ե կաթողիկոսի կենսագրականը, հայկական տառերի գլուտի 1500-ամյակի առթիվ 1912 թվականին «Հայ ժողովրդի մեծ տոնը» և Հայ Եկեղեցու Պատարագամատուցի ռուսերեն թարգմանությունը մանրամասն բացատրությամբ: Թղթակցել է նաև հայ և ռուս պարբերական մամուլին: Իր գործունեության և աշխատանքի համար Տ. Սահակը արժանացել է Խրիմյան Հայրիկի, Գևորգ Ե և Խոսրեն կաթողիկոսների գնահատության և եկեղեցական պարգևատրումների:

1945 թվականից անդամ է Մայր Աթոռ Ս. Էջմիածնի միաբանության: 1947 թվականին արժանանում է ծայրագույն վարդապետության աստիճանին և նշանակվում է Մայր Տաճարի ավագ լուսարար:

Սկսած 1946 թվականից, նա է կազմել Ս. Էջմիածնի օրացույցը:

Երջանկահիշատակ Տ. Գևորգ Զ Կաթողիկոսը 1951 թվականի հուլիսի 8-ին արժանացնում է նրան եպիսկոպոսական բարձր աստիճանի:

Նորին Ս. Օծովություն Տ. Տ. Վազգեն Ա Վեհափառ Հայրապետը, գնահատելով Մայր Աթոռի միաբան, լուսարարապետ և Գերագույն Հոգևոր Խորհրդի ատենապետ գերաշնորհ Տ. Սահակ եպիսկոպոս Տեր-Հովհաննիսյանի երկարամյա և օգտաշատ ծառայությունները եկեղեցական-վանական և ուսուցչական հասարակական ասպարեզներում, Իր գահակալության առաջին տարեդարձի երջանիկ առիթով, 1956 թվականի հոկտեմբեր 7-ին, սրբազանին շնորհում է արքեպիսկոպոսական աստիճան:

Գերաշնորհ Տ. Սահակ արքեպիսկոպոսը հայ եկեղեցականության երիցագույն և սիրված վերջին մոհիգաններից մեկն էր: Նա հոգևորականի իր պատրաստությամբ, հավատարիմ ծառայությամբ և մանավանդ զվարթ բնավորությամբ, իր համեստ անձի շուրջ ստեղծել էր համակրանք և սեր:

Հանգուցյալ սրբազանը, հակառակ իր առաջացյալ տարիքին, հոգով արի էր, աշխատանքում ժիր՝ մինչև վերջին ժամանակները:

Հանգուցյալի վերջին օծումը կատարվեց օգոստոսի 25-ին, շորեքշաբթի օրը, Մայր Տաճարում, ձեռամբ Շիրակի թեմի առաջնորդ գերաշնորհ Տ. Մաշտոց եպիսկոպոս Թաջիրյանի:

Դամբանականը խոսեց Բաբվի թեմի առաջնորդ գերաշնորհ Տ. Հուսիկ եպիսկոպոս Սանթուրյանը, վեր հանելով հանգուցյալի կյանքի և գործունեության ուսանելի կողմերը:

Ժամը 1-ին, Արարատյան թեմի առաջնորդական փոխանորդ գերաշնորհ Տ. Վահան եպիսկոպոսի նախագահությամբ, կատարվեց հանգուցյալի թաղման արարողությունը և աճյունը ամփոփվեց Ս. Գյանեի վանքի միաբանական գերեզմանատանը, ուր դամբանականներ խոսեցին Տ. Վահան եպիսկոպոսը և «Էջմիածին» ամսագրի խմբագիր Ա. Հատիտյանը:

Ժամը 3-ին, վանական սեղանատանը, տրվեց հոգեծաշ, ուր հանգուցյալի հիշատակը ոգեկոչեցին Տ. Մաշտոց եպիսկոպոսը, հանուն Գերագույն Հոգևոր Խորհրդի Գրիգոր Բեքմեդյանը և Մայր Աթոռի դիվանապետ Հայկ Առաքելյանը:

Հանգիստ Տ. Սահակ արքեպիսկոպոս Տեր-Հովհաննիսյանի ոսկորներին:

